

SOLO

Afl. 1.25

BRIYANDO FUERTE • TRECIENDO CLARIDAD
DIAHUEBS 15 FEBRUARI 2024

Di Pueblo

**ATIA HUNTO CU DEPARTAMENTO
DI ADUANA CU INICIATIVA
NOBO PA COMERCIANTE
YAMA "OPTIMALISACION DI
RELACION"**



WWW.SOLODIPUEBLO.COM



SOLODIPUEBLO@GMAIL.COM

**UN HOMBER Y UN MUHER
ARUBIANO DETENI PA
ASESINATO DI SERGIO
MADURO NA MATIVIDIRI**



**SMAC A CLAIM SU
"OWNERSHIP" DI CAISO Y TA
PONE MUSICA LOMBA CONTRA
MURAYA: "TAKE IT OR LEAVE IT"**



**MINISTER DI TURISMO A
REUNI CU APA PA E PROYECTO
DI CRUISE EXPERIENCE
DEVELOPMENT PLAN CU LO
INICIA DEN 2025**



**MINISTER ENDY CROES A REUNI
CU COMISION FIHO DI ENSEÑANSA
DI PARLAMENTO DI ARUBA**



**CHISPA DI CANDELA DI PALET
PATRAS DI CAS A BULA BAY PEGA DI
2 PISO DI PALO DI UN CAS DI BETON
NA CANDELA.**



Minister Dangui Oduber MINISTER DI TURISMO A REUNI CU APA PA E PROYECTO DI CRUISE EXPERIENCE DEVELOPMENT PLAN CU LO INICIA DEN 2025

Minister di Turismo y Salud Publico, sr. Dangui Oduber conhunto cu CEO di APA sr. Marc Figaroa, a reuni pa discuti e masterplan di Aruba Ports Authority N.V. (APA) pa loke ta e proyecto di "Cruise Experience Development Plan" den progreso pa 2025.

Minister Oduber a duna di conoce cu den e Masterplan di APA ta inclui un inversion grandi pae reconstruccion di e cruise terminal nobo pa Aruba. E proyectonan aki sigur lo bay crea oportunidadnan nobo, crea cuponan di trabou y lo bay trece mas entrada pa asina por sigui inverti den nos turismo. Alaves esaki lo yuda pa tin un miho facilidad cu e

turista por disfruta di dje y lo mehora e experiencia di e turistanan crucero.

Aruba Ports Authority a manda busca un consultante pa crea un diseño pa e Aruba Cruise Port nobo. E consultante aki ta renombra pa su "Brand & Experience Design" cu ta conoci di e "Disney brand" y tambe ta un experto den Port and Destination Development enfocando tambe riba e parti experimental di e turistanan crucero. E motibo di bishita pa e consultante tabata pa por a conoce e cruise port di Aruba y henter e area pa asina por evalua tur aspecto di e proyecto manera servicio,



comercial, seguridad di trafico y logistica.

Tambe a reuni cu un grupo selecta di e cruise port community y stakeholders pa por a ricibi informacion y diferente perspectiva di e proyecto aki.

Minister Oduber ta contento cu e gerencia di APA cu progreso di e masterplan pa asina keda ariba e mesun liña di pensamiento y ta mira APA cu un potencial enorme, e ta instrumental pa tur e


desaroyonan economico cu ta na caminda. Minister Dangui Oduber ta segura cu APA tin un futuro briyante cu e proyecto di Cruise Terminal Experience Development plan cu lo inicia den 2025.

BRISA FUERTE A BENTA VARIOS TENT LAGA ATRAS RIBA E RUTA DI E PARADA MEMEY DI CAMINDA



Dialuna mainta polis a haya nan ta hala varios tent cu a ser laga atras riba e ruta di carnaval despues cu brisa fuerte a zwaai nan riba e caminda. Ta urgi tur

hende cu a pone cosnan riba e ruta pa mas pronto posibel kita esakinan pa no stroba ni forma peliger pa esnan cu ta pasa riba acera y caminda.



UN HOMBER Y UN MUHER ARUBIANO DETENI PA ASESINATO DI SERGIO MADURO NA MATIVIDIRI

CASO RESOLVI: Santa Cruz a detene e dama di inicial J.R.G. RECHERCHE SANTA dama di inicial J.R.G. CRUZ A DETENE naci na Aruba di 39 año di edad. 2 PERSONA PA Reche di Santa Cruz nigon dia a ASESINATO DI CASO stop di investiga y poco MATIVIDIRI Desde siman poco a haya suficiente pasa diaranson Reche Santa Cruz (DAR-4) a informacion y prueba pa detene e homber di inicial Ministerio Publico por B.E.J.M. naci na Aruba di duna orden pa detene e dos 37 año di edad relaciona personanan menciona. cu e caso di asesinato di Sergio Maduro cu a tuma Un tremendo trabao lugar dia 24 december di reche nan di 2023. Santa Cruz cu a traha incansablemente pa pone man riba e sospechosonan.



Cu esaki tambe reche di Santa Cruz ta resolve e caso aki! KPA ta haci un apelacion esnan cu sa algo of mira algo yama e tiplijn di polis cu ta 11141. Bo anonimidad ta keda garantisa.

SMAC A CLAIM SU “OWNERSHIP” DI CAISO Y TA PONE MUSICA LOMBA CONTRA MURAYA: “TAKE IT OR LEAVE IT”

Stichting Smac den un rueda di prensa relampago, a anuncia cu nan ta claim bek nan “ownership” riba e festival di Caiso. Den palabra cla nan a bisa: Nos a manda un oferta desde awe pa Musica y Musica tin te dia 4 di Maart 2024 pa contesta.

E hecho cu Musica a pasa tras di lomba di Smac y pidi permiso di directo di polis y cu Polis a bay over na duna Musica permiso, lo no pasa mas. Si Musica no acepta e ofertanan, e ora Smac mes lo cumenza prepara pa organisa e

festival na 2025.

Esey te mensahe cu Smac a trece dilanti y awor Musica kisas ta lomba contra muraya.

Pa algun año caba, Musica ta acudi na polis y ta haya nan permiso. Esaki na forma inexplicabel unda cierto polis ta faborece Musica, sin autorisacion of stempel di Smac. E mensahe a keda bon comprendi: Musica tin cu paga of tuma e festivalnan di muchanan tambe over. Presidente di SMAC a bisa cu dia 13 di febuari 2024 nan a manda un e-mail



pa MUSICA, haciendo nan algun oferta. MUSICA tin te dia 4 di maart 2024 pa contesta. Si MUSICA acepta, nan lo tuma

over e organizacion di festivalnan. Si MUSICA no acepta, SMAC mes lo organisa e festival na 2025 Nos por interpreta cu Smac

a pone Musica awor lomba contra muraya: “Take it or Leave it”

CAMBIA PERSPECTIVA TOCANTE OBESIDAD: SA BO NUMBER Y MIDI BO PESO



CHISPA DI CANDELA DI PALET PATRAS DI CAS A BULA BAY PEGA DI 2 PISO DI PALO DI UN CAS DI BETON NA CANDELA.



Diamars mainta a drenta informe di cu tin un cas na candela na Weg Sero Blanco, mesora a dirigi bomberonan na e sitio.

Na yegada di e prome unidad a bin constata cu aki ta trata di un cas abao di bloki cement y ariba (di 2 piso di palo) y e parti aki lo a pega na candela despues

di cu palet tabata ser kima na e parti patras di e cas y e chispanan di candela a pega e palonan na candela y e piso ariba cual ta full di palo a kima por completo mientras e parti abao a sufri daño di awa.

Polis tambe a presenta y a traha un rapport di e sucedido.

Minister Dangui Oduber

BISHITA DI STUDIANTE DI EPI PA SA MAS DI MINISTERIO DI SALUD PUBLICO

Diaranson mainta Minister Dangui Oduber a ricibi bishita di dos estudiante di EPI di e facultad di Hospitalidad & Turismo. Nan a bin di bishita pa haya mas informacion tocante e maneho cu ministerio di salud publico sr. Dangui Oduber ta hiba en conexion cu prevencion.

Tambe e studantenan a bin cu pregunta di e topiconan manera; ley nan cu tin di medicina natural, Seguro di medico pa turista, e plan di prevencion pa Aruba, oportunidad nan di turismo medico na Aruba.

Minister Oduber a haya e oportunidad pa informa y intercambia informacion tocante proyectonan importante andando pa loko ta e plan di prevencion pa nos ciudadanonan. E studiantenan ta haciendo nan estudio ariba e matematica di "Burgerschap" unda nan tin cu ricibi mas informacion di e situacion di cuida na Aruba.

Minister Oduber a menciona diferente proyectonan y tambe diferente organisacion cu tin actualmente na Aruba cu ta trahando ariba

mehoracion di pueblo su salud. Instancianan manera Aruba Healthy Lifestyle Center, Scol Saludabel, Jump18, Improving Lives Together, pa menciona un par.

Minister Dangui Oduber a finaliza bisando cu e ta admira studiantenan cu ta bin cu iniciativa y cu ta scohe e sorto di topiconan aki pa nan proyecto di scol. Topiconan importante manera di salud publico & prevencion na Aruba. Minister Oduber a dunanan danki y deseanan tur cos bon pa cu nan estudio.



Prome Minister Evelyn Wever-Croes:

PROME MINISTER A REUNI CU E REPRESENTANTE DI HULANDA NA ARUBA, SR VINCENT STORIMANS

Diamars mainta, Prome Minister Evelyn Wever-Croes a reuni cu e representante di Hulanda na Aruba, Vertegenwoordiging van Nederland in Oranjestad (VNO), sr Vincent Storimans.

Prome Minister a indica cu aña pasa durante e prome conferencia di clima y energia, "Caribbean Climate & Energy Conference (CCEC), cu a tuma luga na Aruba, dia 10-12 di Mei, Minister Rob Jetten, reconociendo

e retonan cu e islanan tin riba nivel financiero pa por carga inversionnan di e magnitud aki, a compromete di lo yuda e islanan cu 100 miyon Euro pa sigura cu Reino completo ta riba e mesun caminda energetico pa combati cambio climatico y tambe apoya e transicion energetico manera e.o. Aruba Hydrogen Valley.

Mirando cu Aruba ta kedando cla cu e trabounan pa por ricibi e fondo aki, Prome Minister a reuni cu sr Storimans



(VNO), pa hunto explora pa cua proyectonan sostenibel, Aruba lo por bin na remarke pa fondo. E

exigencia y condicionnan pa lanta e fondo aki, lo wordo publica pronto pa tanto proyectonan di

gobierno y di institutonan semi-gubernamental cu tambe por bin na remarke pa esaki.

Parlamentario Shailiny Tromp-Lee na 24ora (MEP):

SENSACION NA MONTON: MINISTER ARENDS VS. EX VICE-PRESIDENTE NUBOER, DOS COS DIFERENTE!

Awe mi a habri mi dia cu un rueda di prensa. Contrario na loke ta usual, mi tabatin e honor di ricibi "bishita" di 24ora. Un bishita sensacionalista buscando oxigeno pa mantene un noticia bibo na beneficio partidista. Un solo pregunta nan a bin cun'e: Kico ta mi opinion encuanto e sucedido di Ursell Arends cu e boter di cerbes etc, mirando cu na 2021 mi a haci pregunta na Gobierno over di ARA su miembro e tempo ey, sr. Nuboer, over su comportacion y irresponsabilidad. Mi a termina mi contestacion na 24ora bisando cu no a toca ni Gobierno, ni Parlamento pa actua mirando cu e persona en

cuestion mes a retira na 2021. Dus e mes a asumi su responsabilidad.

Pa loke ta trata e sucedido y comparacion ta lo siguiente. Na 2021 y si puntra mi awe, mi ta keda para pa e hecho cu na tur momento nos mester garantisa e integridad y bon number di ARA. Esaki mester keda manteni na halto. Na 2021 mi a reaccion a abase di loke a sali den prensa y riba rednan social. E tempo ey tabata keda indica cu e sucedido aki, caminda e Vice Presidente di ARA a keda hiba warda di polis pa mal comportacion causa di buracheria. Hasta a keda indica door di prensa cu no tawata e prome biaha

cu algo similar a tuma lugar cu e mesun persona en cuestion aki. Mirando e situacion delicado y sigur no apropia mi a dirigi preguntanan na Gobierno pa puntra con ta bay atende cu e caso aki. Mi a referi e tempo ey na eCodigo di Conducta di ARA di aña 2010, art. 6 inciso 2 sub d di Ordenansa di Controlaria General, cu ta trata retiro pa actuacion inapropia of haci muestra di malcomportacion. Ta bon pa subraya e hecho cu e persona en cuestion ya na 2016 su integridad a keda trata pa un otro Fraccion di MEP e tempo ey pa e caso di Insel Air N.V., esta e falta di cumplimento cu obligacion fiscal, situacion di

faillisment di e compania y perdida di trabou door di trahadornan. E tempo ey e tabata CEO di e compania en cuestion y alabes miembro di ARA.

Finalisando mi a y ta keda subraya cu mi ta mantene e opinion cu un Vice Presidente di un Hoge College van Staat su responsabilidad y oblogacion ta pa percura pa no atacha e bon number di ARA y mas cu tur cos e mester mantene e confiansa di pueblo na tur momento. Ta inacceptabel cu den un puesto clave asina ta malcomporta pa motibo di uzo excesivo di alcohol te cu mester intermediacion di polis! Den e caso di Minister



Ursell Arends sigur no ta trata di buracheria, tampoco tawata tin autoridad involucre y sigur no ta algo ripititivo. Minister Arends ta papia di un descuido y cu el a siña di esaki. Ami sigur ta subraya e hecho cu ora bo ta bebe no stuur y si bo ta stuur no bebe. No ta abo so bo ta pone na peliger, pero tur otro riba caminda.

ARUBA BANK TA ANUNCIA SU CONTRIBUCION NA ARUBA SCHOLARSHIP FOUNDATION



14 di februari, 2024 – Den un colaboracion importante pa sostene educacion di nos hobennan, Aruba Bank a sera un acuerdo cu Aruba Scholarship Foundation.

E acuerdo, firma riba 1 di februari, 2024, ta e compromiso di Aruba Bank pa contribui cu 9,000 Florin anualmente durante e proximo cuater aña, cuminsando for di

e aña academico 2024-2025 te cu 2027-2028, pa financia "scholarship" pa e studiantenan local.

Sra. Edseline Leer – Semeleer, Head of Retail Banking y Sr. Ramon Mas, Head of Corporate & Platinum Banking a comparti nan entusiasmo tocante e colaboracion y a expresa, "Aruba Bank ta comprometi cu desaroyo y prosperidad di nos



comunidad.

Nos ta kere den e poder di educacion y nos ta orguyoso di sostene Aruba Scholarship Foundation den nan mision pa brinda oportunidadnan educativo na nos hobennan."

Representante di Aruba Scholarship Foundation, Sra. Lydia Emerencia,

Secretaria di Directiva a gradici Aruba Bank pa e contribucion y a comparti informacion valiosa di nan rol den nos comunidad pa asina garantiza e formacion di nos futuro lidernan.

Contribucion di Aruba Bank lo tuma lugar anualmente, **c o n t r i b u y e n d o** directamente na e fondo di

e fundacion, y asina segura cu e studiantenan ricibi e sosten cu nan mester pa continua nan educacion avansa.

E colaboracion entre Aruba Bank y Aruba Scholarship Foundation ta realiza un compromiso cu futuro di e hobennan di Aruba.

MINISTER MADURO A REUNI CU E COMPANIA DI RATING STANDARD & POOR'S CU TA EVALUA ARUBA SU CREDIBILIDAD FINANCIERO Y ECONOMICO

Fin di maart por spera e resultado di e evaluacion Aruba ta prepara pa subi mercado internacional di capital y pa e motibo aki Minister Maduro di Finansa ta reuni den e dianan aki cu companianan di rating pa asina por ricibi e evaluacion financiero y economico necesario di e credibilidad financiero di nos Pais. Siman pasa Minister Maduro hunto cu e ekipo di Departamento di Finansa a reuni cu ehecutivonan di Standard & Poor's (S&P) riba e

evaluacion di nos Pais su situacion financiero y economico. Tabata un bon reunion den cual a repasa informacion economico mas reciente, e resultado di e ehecucion di presupuesto y cambianan fiscal, maneho di debe y a repasa e trabounan cu ta tumando luga den cuadro di e Landspakket acorda cu Hulanda.

A prima vista, S&P ta satisfecho pa mira e pasonan cu a wordo tuma pa asina Aruba por a



recupera di e pandemia y desicionan cu ta concretisa awo den estabilidad financiero pa Aruba cu ta yuda mantene y crece e credibilidad financiero di

nos Pais.

Minister Maduro ta gradici tur stakeholders pa nan input balioso pa e evaluacion di Aruba y ta

gradici e team di S&P pa nan trabou dedica y nan bon cooperacion di semper pa Aruba. Fin di maart por spera e resultado di e evaluacion.

MINISTER ENDY CROES A REUNI CU COMISION FIHO DI ENSEÑANSA DI PARLAMENTO DI ARUBA

Unda a trata e topico di “normbedrag”.



Dia 2 di februari ultimo, Minister Endy Croes a reuni cu comision fiho di enseñansa di Parlamento di Aruba. Unda cu a trata e topico di “normbedrag”. Minister Endy Croes a duna un splicacion amplio di e resultadonan di e investigacion. Tambe, presente na e reunion tabata Sr. Junny Figaroa y Sr. Hervé Ruiz, kendenan ta forma parti di Duos y ta atende cu e scolnan cu ta ricibi subsidio di gobierno. A trata den detaye kico tur

a haci pa logra aumenta e “normbedrag”. Manera ta conoci, desde 2010 no a ahusta e “normbedrag”. Pues, e “normbedrag” tabata core 13 aña atrasa. Un total di dies (10) aña di retraso unda cu a otorga 6.4 miyon florin.

E ley ta bisa cu cada tres (3) aña mester calcula si mester aumenta of reduci e suma aki. E “normbedrag” ta ancra den ley y ta e compensacion cu schoolbesturen

ta ricibi a traves di “exploitatie subsidie”. E ultimo rapport oficial ta di aña 2009 y e ultimo aumento a tuma luga na aña 2010. Desde e tempo ey nunca mas a traha un rapport y no a ahusta e “normbedrag”. Pa por fiha e “normbedrag” nobo Duos y DOW a haci un investigacion. Den luna di maart 2023 DOW a produci un rapport nobo y hunto cu e rapport Erasmus Consulting & Training di 2020 a yega na

e conclusion final cu mester aumenta e “normbedrag” cu 6.4 miyon florin.

Dia 4 di september den e tratamento di “voorjaarsnota”, Parlamento di Aruba a aproba 50%, esta 3.2 miyon florin. Den luna di december aña 2023, ora cu Parlamento di Aruba a trata Presupuesto di Pais Aruba a aproba e otro 50%, esta 3.2 miyon florin. Pues, un total di 6.4 miyon florin a haal in te cu aña

2023. Esaki ta significa cu a inverti hopi mas placa den enseñansa pa asina e schoolbesturen por cubri nan gastonan. Tur parlamentario presente di tur fraccion a haci varios pregunta y Minister Endy Croes a elabora riba esakinan. Pa conclui, Minister Endy Croes a indica cu e tabata un reunion hopi exitoso unda cu a comparti informacion valioso cu Parlamento di Aruba.

POLIS A DETENE CHAUFFEUR BURACHI CU A CAUSA UN ACCIDENTE NA MACUARIMA

Dialuna anochi a drenta informe di un accidente riba e caminda principal na Macuarima, mesora a dirigi un patruya na e sitio. Na yegada di e patruya a bin compronde cu aki ta trata di un accidente entre un Nissan March y un Chevrolet Spark unda e chauffeur di e Nissan March no a regula su velocidadni mantene su

distancia a bay dal tras di e Chevrolet Spark. Polis a nota cu e aliento di e chauffeur ta hole na alcohol, su wowonan tabata cora y tabata papia cu lenga pisa. E chauffeur a ser pidi pa sali for di e auto pa haci e test, ademas polis a nota cu e no por a para stabiel riba su pianan. E resultado ta cu ela surpasa e limite y a keda deteni



pa a core auto un accidente. bao influencia Afortunadamente ningun y causa hende a resulta herida.

CARNAVAL 70 PARADA GRANDI



CARNAVAL 70 PARADA GRANDI



sibemdia 2010UT2

sibemdia 2010UT2

sibemdia 2010UT2

Amigo ARUBA

ARUBA TOURIST CHANNEL

ATIA HUNTO CU DEPARTAMENTO DI ADUANA CU INICIATIVA NOBO PA COMERCIANTE YAMA “OPTIMALISACION DI RELACION”



Ariba 13 februari 2024, Aruba Trade & Industry Association (ATIA) hunto cu Departamento di Aduana Aruba a inicia, den un sala completamente yen, un proyecto nobo yama “Optimalisacion di Relacion” (“Douane Relatie Optimalisatie Uurtje”). E iniciativa aki no ta uno nobo, pero 20 aña pasa ATIA y Aduana a introduci algo similar cu tawata un exito rotundo. E idea di e sesion aki ta cu tur comerciante por pasa libremente y haya informacion of haci pregunta specifico na e Management Team di Aduana sin compromiso. E meta final ta cu comerciante, brokers, y otro importador por crea un conexion y relacion mas personal cu Management Team di Aduana. E sesionnan aki lo wordo organisa mensualmente riba cada di dos diamars di luna na oficina di Aduana

di 3or pa 4or y mei, pues e proximo sesion lo ta 12 maart 2024.

Durante e prome sesion a toca e siguiente topiconan:

- Rol y responsabilidad di Aduana.
- Ley di importacion nobo (“Algemene Landsverordering Douane en Accijnzen – ALDA”), cu awo ta drelando den su trayectoria di legislacion, pero no tin fecha pa bai Parlamento ainda.
- Calculacion correcto di “Douane Waarde”.
- Ki ora si por inclui descuento of no especialment den caso cu haya descuento por ehempel riba websites manera Amazon of descuento ora cumpra “cash” of “bulk”. Mas info por lesa e comunicado di September 2022 (<https://www.douane.aw/departamento-di-aduana-a-tene-reunion-cu-cua-y-atia-pa-loke-ta-e->



cambio-riba-maneho-di-descuento-riba-factura/).

- Proceso y procedura pa debilbe placa (“restitutie”).
- Declaranten Cursus cu diamars awo 20 februari lo cuminsa cu su di 7 edicion. Despues di e presentacion di Director di Aduana Sr. Ricky Croes, participante nan por a hasi pregunta. Aki hopi participante a hasi uso di e oportunidad aki pa hasi pregunta en general pero tambe riba caso specifico cu ta toca nan compania. Punto nan interesante cu a bin dilanti ta:

- Proceso pa reemplaza productonan cu a yega defecto, dañá of expira.
- Casonan specifico pa cargo aereo.
- Caso nan mas specifico pa cu “douane waarde”.
- “Coupons” riba Amazon, cu ta un topico cu Douane ta investigando y lo informa comercio y pueblo en general di dje pronto. ATIA lo bai agrega un recordatorio pa cada sesion riba su rednan social manera “Facebook, Instagram y LinkedIn”, pues si tin interes, ta pidi pa



sigui nos rednan social pa keda informa di tur ATIA su sesionnan y cursonan pa 2024. Si tin pregunta por semper tuma contacto cu e team di ATIA.
CONTACT:
Herrick Henriquez
Director
582-7593
herrick@atiaruba.org
###

ATIA Aruba Trade and Industry Association (ATIA) a wordo funda na aña 1945 y ta e organizacion principal cu

ta representa empresanan, empresarionan y comercio na Aruba. E meta di ATIA ta pa defende, promove y proteha e interesnan di su miembronan y comercio di Aruba en general. Pa mas informacion por bishita www.atiaruba.org y nos rednan social www.facebook.com/arubatrade, www.instagram.com/atiaruba, y <https://www.linkedin.com/company/aruba-trade-and-industry-association>

Parlamentario independiente Rycond do Nascimento: PIRAMID DI PATRONAHE POLITICO



Tulipan, Ibis y Avestruz como simbolo

Tulipan ta e nomber cu Ministerio Publico (OM) a duna e caso di Besaril. E nomber ta corda nos cu flor ta

seca y ta marchita y cu gloria di hende no ta pa semper. Ibis y Avestruz como nomber pa casonan di

soborno di Paul y Benny ta muestra uzo di simbolismo, cu ta enfatisa cu nos sociedad tin un problema mas profundo cu simplemente algun appel putri.

E historia Egipcio di e lucha entre Horus y Seth ta siña cu un sociedad ta enfrenta continuamente forsanan di corrupcion y decadencia. Den e storia, Seth, cu tabata e dios di caos, a purba mata Horus.

Horus tabata e dios di un ordo social husto. Den e lucha, Horus a perde un wowo y casi su mesun bida. E

momento ey e dios Thoth, cu tabatin e cabes di ibis, a bin yuda Horus y a cura e wowo di Horus. Esaki a

permiti Horus restaura un sociedad husto. Den e trabao aki el a wordo yuda pa Thoth, e dios di magia y

sabiduria. Ademá, Horus a ser yuda pa e dios Maat, cu tabata e dios di e berdad y husticia y cu ta ser

representa cu un pluma di avestruz.

Door di uza e ibis y e avestruz, OM ta indica cu solamente sabiduria, berdad y husticia por restaura nos sociedad di e deterioro causa pa corrupcion y abuso di poder.

Structura di poder secreto: un elite comercial y politico

Aruba conoce un elite comercial y politico, cu ta ansioso pa mantene poder y rikesa. Antes nan tabata permiti nan yiunan casa solamente cu personanan di e famianan cu placa, pa nan mantene nan poder. Famianan manera Eman, De Veer y Arends, tabata conoci pa nan rikesa of influencia politico.

Aunke e poder di algun famia a disminui cu tempo, e clase dominante a reforsa su mes cu famianan nobo, manera e famia Mansur. E famianan aki tabata controla politica financiando e partidonan politico. E

politiconan tabata obedece e famianan, pasobra nan tabatin temor pa perde financiamento politico.

Pero, e Status Aparte a duna AVP y MEP un control sin precedente riba tereno comercial, cuponan di trabao den gobierno, contractnan, permiso, etc. Siguientemente AVP y MEP a cuminsa aplica e mesun formula di e famianan poderoso. Asina, AVP y MEP a bira esunnan cu ta parti fabornan gubernamental

na campañadonan y votadornan en cambio di nan lealtad. Pareu cu esey, AVP y MEP a crea un cultura di

miedo, obligando hende pa obedece e partido of cera nan boca encuanto e abusanan.

Esaki a crea un structura di un piramid opresivo. E pico ta e famianan poderso, meymey tin e monopolio

AVP-MEP y pueblo ta e parti abao. Miedo y manipulacion: e tacticanan di patronahe politico

Pa mantene poder, e piramid ta fomenta un cultura di miedo den nos sociedad. Den e sistema aki, hende tin temor constante pa represalia of humiliacion. E obhetivo ta pa hende traha duro pa e

interesnan di e politiconan, pa nan ta obediente y pa nan no bay contra e politiconan.

Uzando patronahe politico AVP y MEP a bira grandi, loke ta haci nan menos obediente na e famianan poderoso. P'esey e famianan a cuminsa financia partidonan chikito, obligando AVP y MEP forma

coalicionnan. Asina, partidonan chikito tabata yuda mantene e interesnan di e famianan poderoso halto

riba e agenda politico. E tacticanan aki ta yama "oposicion controla", pasobra pueblo ta kere cu tur e

partidonan chikito ta alternativanan real, aunke hopi biaha nan ta marioneta. Un ehempel claro tabata

partido OLA. RAIZ tambe a cuminsa muestra e mesun caracteristicanan aki y Miguel Mansur y Gerlien

Croes ta parce di bay den e mesun direccion.

Enfin, e sistema di patronahe politico tin gran beneficio financiero pa e piramid. Pero, pa e poblacion oprimi, e piramid ta un problema grandi. E piramid ta mira e poblacion manera un baca lechera cu

mester paga impuestonan cada bes mas halto pa tur e fabornan cu AVP y MEP ta parti.

E piramid kier pa pueblo keda financieramente vulnerabel y cu un educacion limita. E piramid kier pa bo

bay di fiesta pa fiesta, pa bo no duna demasiado atencion na problemanan politico. Asina, e por uza pueblo como un obheto

controlabel. P'esey e sistema ta crea empleo mal paga, cu horario di trabao

demasiado largo, hopi biaha den un ambiente di trabao toxico. Nos ta biba pega den debe, mientras costo di bida ta exorbitantemente halto. E sistema ta mata yen oportunidad pa exito y ora e sistema no

mester di bo mas como su catibo, simplemente e ta tira bo un banda. Speransa den cambio: un era nobo pa politica

Tin speransa. Ya nos ta mira e prome señalnan di un desaroyo nobo, den cual MEP a pone "integridad"

como lema di campaña y MAS a pone elimina "empleo fantasma" na top di su agenda politico. Aunke e casonan penal Tulipan, Kwihy y Anglo ta

indica cu MEP ainda ta enfrenta retonan di e lucha contra corrupcion interno, e partido publicamente ta afirma cu e ta para pa integridad.

Solamente AVP ta sigui hustifica corrupcion, gañando pueblo abiertamente.

Nos sa kico ta e solucionnan pa restaura nos sociedad. Cada persona mester por progresa segun su propio esfuerso, teniendo cuenta cu tur menos afortuna.

Esey ta un meritocracia. Nos mester laga AVP para na banda te ora e siña desaroya capacidad di autolimpieza. Nos mester stop e "impotencia aprendida" (na Ingles: learned helplessness) y combati corrupcion promoviendo procesonan di decision

profesional den gobierno. Nos mester colabora cu Hulanda, ya cu supervision financiero, Landspakket y e refuerso di Ministerio Publico ta elimina patronahe politico.

E ta nos deber pa crea un sociedad husto.

FORTALEZA PA FAMIA

Scirbi pa Pastor Marcel Balootje.

E AMOR DI DIOS TA MARAVIYOSO

E amor di Dios, ta grandi, poderoso, no tin pa compara cune. e ta perfecto. fiel, berdadero, simpel y mas cu tur cos e ta eterno.

E amor di Dios ta cariño pa nos bida, e ta nos Salvacion, nos redencion, nos sanacion, gracia y fabor riba nos bida, e ta bida eterno pa nos, cual ta cuminsa for di ora nos kere y entrega nos bida na Cristo Hesus.

Dios den su inmenso amor ta perdona y e ta lubida, e no ta keda rabia pa semper, mes leu cu pariba ta for di pabao asina a separa nos picanan for di nos.

Dios ta stima e mundo asina tanto cu E a duna Su yiu unigenito, pa ken cu kere den dj'E no bay perdi, ma tin bida eterna.

Cristo Hesus a entrega Su bida pa nos tur, cu kere den dj'E, tin hopi

awendia cu no kier acepta Cristo Hesus como nan Señor y Salvador, y nan ta prefera di biba den securidad, inmoralidad y hasta abominacion.

E amor di Dios ta asina maraviyoso, cu Dios ta duna oportunidad, na tur esnan cu kier arepentí, E ta cambia bida di e malbado, criminal, immoral, haci nan Su sirbido y un vaso di honor, Riba e mundo aki nos tur tin mester di e amor di Dios, pasobra ta dos caminda bo por scohe, sea bida eterna den Cristo, of morto eterno den man di diabel, esaki ta algo cu tur hende mester ta consciente di dj'e, pasobra ta ora bo ta na bida, bo mester dicidi, pa asina bo prepara bo encuentro cu Dios.

Ora bo muri hende ta dicidi, sea bo ta wordo dera, of crema, pasobra tur cos ta bay segun e budget ta permiti, ora bo muri abo no por

dicidi nada mas, ta solamente esnan cu ta respeta bo lo por percura, pa haci manera bo a bisa tempo bo tabata na bida.

Mescos cu ora bo muri, bo no por cambia nada mas, ni ningun hende por cambia algo pa bo serca Dios, ta ora bo ta na bida, bo tin di scohe y biba pa Dios, esaki ta algo cu hopi tin di compronde ainda, pasobra ora bo muri y bay fierno ta eyden bo ta keda eternamente, ningun oracion por saca bo for di fierno y hinca bo den cielo, mescos cu ora bo muri y bay cielo, eyden lo bo keda eternamente serca Señor,

Esaki no ta religion, pasobra bo no ta bay cielo pa religion, bo ta bay cielo pa bo relacion cu Cristo Hesus, pasobra bo a kere den dj'E manera Su Tata a ordena, pasobra E ta e unico mediador entre Dios y hende, tur cu kier yega serca e

Tata mester pasa pa medio di e Yiu.

Esaki ta loke Señor a haci y e ta maraviyoso den nos bista.(Salmo 118:23).

Laga tur esnan cu ta tuma refugio den Bo alegra nan mes, laga nan canta di alegria pa semper, pasobra abo ta proteha nan, laga esnan cu ta stima Bo nomber regosiha den Bo. Pasobra ta Abo, Oh Señor ta bendiciona e hende husto, manera cu un escudo, bo ta rondone cu fabor.(Salmo 5:11-12).

Serca Dios tur dia ta dia di amor, dia di amistad, dia di pordon, dia di salvacion, Dios su brasa ta habri semper pa esnan cu kier bini serca dj'E, nunca e ta laga bo bandona.

Ken por separa nos for di e amor di Cristo Hesus? Su amor ta berdadero, eterno, fiel y maraviyoso, Sinceramente, Pastor Marcel Balootje.

POLIS A PARA UN AUTO CU TABATA CORE MALO Y A BIN RESULTA UN CHAUFFEUR BURACHI Y A DETENE



Diadomingo anochi e chauffeur tabata bebi y durante patruya banda di a pon'e test a bin resulta ex-Drive Inn polis a nota cu ela surpasa e limite y a un auto coriendo malo y a keda deteni. bay par'e. Polis a nota cu



E senciyo nobo ta titula “FIEST’AWE” DI TREBOR S’ROC FT. THE URBAN CLASSIC X-PERIENCE

Despues di Trebor S’Roc su exito manera “Kurason y Mi ke por [Tra tra tra]” ambos acupante di posicion clave posicionando su mes den

e miho 3nan di Top nan musical local, awo t’e momento exacto pa lanza e tema promocional aki despues di e temporada di carnaval pa lanza

Trebor S’Roc su prome senciyo pa 2024 cu a ser titula “Fiest’awe”.

E tema’ki ta un mescal di instrument nan clasico di cual a invita e cuarteto di cuerda pa combina esaki cu ritmo nan Urbano di Caribe.



PRONOSTICO DI TEMPO VALIDO TE DIAHUEBS 15 DI FEBRUARI 2024, 18:00 ORA

TEMPO:
AWE TARDI Y AWE NOCHI: PARCIALMENTE NUBLA Y GENERALMENTE SECO

DEN MARDUGA Y MAYAN: PARCIAMENTE NUBLA CU UN POSIBLE AWACERO PASAJERO

TEMPERATURA MAXIMO 32 GRADO CELSIUS
TEMPERATURA MINIMO 26 GRADO CELSIUS
INDICE DI CALOR (HEAT INDEX) DEN Y ROND DI ORANAN DI MERDIA: 33 PA 38 GRADO CELSIUS
LO SIGUI STROBA E VISIBILIDAD Y AFECTA E CALIDAD DI AIRE DEN REGION. PERSONANAN CU TIN ALERGIA

RESPIRATORIO MESTER TENE CUENTA CU ESAKI. CONDICIONAN MARITIMO/ ESTADO DI LAMA: LOCALMENTE POCO BRUTO CU OLANAN DI 5 PA 6, LOCALMENTE 7 PIA

AVISO/ ALERTA:
UN AVISO PA BOTO CHIKITO TA NA VIGOR PA PARTINANOOST TE NOORDWEST DI COSTA Y LAMA HABRI...

TA PIDI E OCUPANTENAN DI BOTO CHIKITO PA BAI CU

CAUTELA NA E PARTINAN OOST TE NOORDWEST DI COSTA Y LAMA HABRI DEBI CU E BIEN TO DURO LO HACI LAMA

LOCALMENTE POCO BRUTO.\FENOMENONAN SPECIAL:PARCIALMENTE NUBLA CU UN POSIBLE AWACERO PASAJERO.

BIEN TO LO TA FOR DI DIRECCION NOORDOOST TE OOSTRAFAGA.

TEMPERATURA (GRADO CELSIUS)


MAX / MIN LO TA: 31 / 26

DEPARTAMENTO METEOROLOGICO ARUBA
DIARANSON 14 DI FEBRUARI 2024 17:00 (21:00 UTC)

“Fiest’awe” tin un mensahe vibrante di biba pa loke nos ta biba awendia pa awe. E ta papia di brasa bida cu tur su cos nan bon y di mes esnan menos bon. Den e tema aki Trebor S’Roc ta resalta e harmonia di instrumento nan clasico, pero tambe e sonido alegre y energetico di e ritmo Soca Caribense.

E tema aki ta representa e forma di biba y disfruta di momento nan presente, di no laga bida pasa bo bay, biba y gosa awe. Ademas con cu bida bay nos tin di wak’e manera “Fiest’awe”!

Mester resalta e talentoso cuarteto di cuerde “The Urban Classic X-perience” cu a haci nan magia dunando asina un toke magico te hasta unico y habri un un spectrum di sonido diferente cun otro dimencion di loke ta sonando riba ‘main stream’. Simplemente goza di e fusion aki di Trebor S’Roc cu a canaliza esaki di un forma medolico na nos dushi bida, asina ta ban “Fiest’awe”



9			4	2			3
		6				5	
3				6		8	
7		2		9			
6	3						5 8
				8		2	7
		7		4			9
		8				3	
	6			5	7		1

8							
		3	6				
	7			9		2	
	5				7		
				4	5	7	
			1				3
		1					6 8
		8	5				1
	9					4	

ADDONSITO TA FELICITA LILLYPUTTERS SPEELSCHOOL CU ELECCION DI REINA 2024



speelschool. Esaki a tuma luga den Renaissance Convention Center. E team dinamico di maestronan Suhein, Nadesca, Ina, Erin y Lilly asisti pa Darinka, Darienne, Valery, Mila y Maria Kamilia, a comberti e sala den un sala colorido y carnavalesco. E tema tawata "Candy Sweet World" y e muchanan a demostra n'e publico con dushi nan ta baila y gosa. E cuerpo di hurado a consisiti di personahenan local cu ta hunga rol importante den Aruba su carnaval. Nan tawata Miraila de Cuba, Maribel Andrade, Louella Gomez, Natasha Richardson Ras y Adriana Merryweather. E 4 prinsnan tawata Luca Lopez, Ayden Rasmijn, Adrian Ramirez y Marcel Ecury.

E resultado ta:
Bailarina Lillyputter: Zainali Werleman
Barbie Lillyputter: Alyson Lacle
Popchi Lillyputter: Sarah Trimon
Princess Lillyputter: Lya Oduber
2 nd -runner-up: Sophia Kelly
1 st -runner-up: Miranda Mansur
REINA '24: Adela Maduro Semper juffrouw Lilly Arends y Lillyputters ta gradici e colaboracion di Emperatriz Perdomo, Dj Atronchi, Elite Productions, EZ Party Sollutions, Reina Infantil 2024 Xeena Dijkhof, Tumberito 2024 Ian Tromp, Reina saliente di Lillyputters Elaine Tromp y di tur cu a haci e evento grandi aki posibel.

Recientemente mi tawatin e placer di fungi como e MC

p'e eleccion di princesita 2024 di Lillyputters

ORACION DI DIA



Un feliz dia yena di bendicion, amor y paz di Señor.

'Si un hende ta hay'e tenta pa prueba, e no mester bisa: 'Ta Dios mes ta haci pa mi cay den tentacion,' pasobra maldad no por tenta Dios, ni Dios mes no ta haci pa hende cay den tentacion!' (Hacobo 1,13)
Esaki ta pa kita tur duda cu ta Dios ta pone nos pasa den prueba.

Maldad no por tenta Dios, ni Dios mes no ta haci hende cay den tentacion. Pruebanan cu nos ta pasa aden ta nos mes ta responsabel p'esey. Ora constantemente nos tin un mal pensamiento y ta keda cu e pensamiento ey den nos mente, e ta pone nos cay den tentacion y ta pone cu nos ta bay na concebi e pica. Prueba, nos tur ta pasa aden. Loke nos tin di haci ta di keda para firme no obstante kico nos ta of a pasa aden. Y ora nos supera e prueba, Dios tin nos recompensa pa nos.

Dios semper kier tur cos bon pa nos, Dios ta amor. Nos tin di libra nos mes for di mal pensamentonan y mal deseonan. Nos tin cu pidi Dios semper fortaleza y pa guia pa Spirito Santo, semper nos por bringa e mal pensamentonan.

Oracion: Dios Tata, yuda nos pa keda cu un mente positivo, pa no cay den tentacion. Laga pa medio di Cristo Hesus nos wordo guia pa Spirito Santo pa por keda riba e bon caminda den number di Hesus. Amen.

Dios a mira cu e tawata cansa ora no tawata tin cura mas, ela pone su brasanan rond di dje y bisa bin serca mi y dune sosiego.

“Bou di alanan di Dios mi ta sigur” Salmo 91



Cornelie Petra Henriquez

mihor conoci como Cornelia of "Zuster Henriquez"

***16-05-1940-†10-02-2024**

Na number di su ruman: Ana Van Ierland Henriquez

Subrino y subrinanan : Isa Henriquez, Juan 'Juni' Henriquez, Daphne Henriquez, Maureen Van Ierland, Monique y Pablo Plaza, Gwendy Raaz y Mario, Etienne y Uly Maduro, Laurene Raaz y Anthony

Manera nieto y nietanan: Donovan y Cindy, Juelaime y Jose Andres, Eliandra, Zabdi, Vashti,

Manera Bisanietanan: Jaylee, Azizah, Ara Mae ,Vivienne

Primanan y primonan: Juby Kwidama y famia, Corry Paesch y famia, Nito y Marian Paesch Boekhoudt y famia, Cathy Paesch y Hans Meijer y famia, Bea y Ramon Statia y famia, Adri y Iris Paesch y famia

Amiganan di cas: Erna Solognier y famia, Arilia De La Mare y famia, Carmen Robles y famia, Dita Matos, Yolanda Martes, Ena Bardouille , Bets

Ayudante di kas: Flora Galindo

Ex-colega y amiganan di dr. Horacio Oduber Hospitaal, amistadnan di Alambra Casino

Famianan: Henriquez, Van Ierland, Maduro, Plaza, Suriana, Alvarez, Kock, Chirinos, de Graaf, Paesch, Bislip, Kwidama Statia, Lambrinos, Reinkingh, Meijer, Castro, Solognier, Dorothal, Morel, Quant, Wever, Ponson, De Cuba , demas famianan y conocirnan na Aruba y Hulanda.

Oportunidad pa condolencia:

Diaranson 14 di Februari, 2024 for di 7:00-9:00 P.M. na Olive Tree Funeral Care & Crematory na Piedra Plat 27Z.

Acto di entiero lo tuma lugar Diahuebs 15 di Februari, 2024 for di 2:00 – 4:00 P.M. na Pro-Catedral San Francisco na Playa y despues ta sali pa Santana Catolico (zuid) na Oranjestad

Nos disculpa si den nos tristesa nos por a lubida un of mas famia.

Obituario

Publica serka nos anuncio di fayecimento di bo ser keru. Nos tin 2 pakete pa ofrece;

Pakete 1: Anuncio di fayecimento te dia cu e defunto ser dera

Gradicimento y invitashon pa misa pa 3 dia AFI 250,00

Pakete 2: Anuncio di fayecimento te dia cu e defunto ser dera

Gradicimento y invitashon pa misa pa 3 dia

Na Canal 22 1x prome cu Noticiero 22 Afi 400,00

Pa mas informashon por tuma contacto cu oficina na

585-9500 of na 741-4554

CARNAVAL 70 PARADA GRANDI

